


*Kerueborsch  
vom Hessische  
Hof  
Worfelle*



*Kerwespruch 1991*

# Kerweborsch vom Hessische Hof, Worfelle

Kerwespruch 1991

Seite 1

## KERWESPRUCH 1991

Ich grieb eich all, ehr Dame un ehr Herrn,  
ob vun nah orrer aa vun fern,  
seid uns willkumme, ehr liewe Leit,  
in Worfelle es wirrer Kerwezeit!

Soin die Ährn erst rum, die Frucht es ob,  
do hot es Örtche nur noch Oans im Kopp,  
iwverall do kann mers rischtisch spiehrn,  
gonz Worfelle es kräftisch om rotiern.  
In jedem Haus un in alle Kische,  
duhts noach Quetschekuche rische,  
die Motter war kräftisch schunn om riehrn,  
de Vadder muß de Kuchedeig browiern,  
un unser Oma sucht in alle Dotte,  
sie will ehr Sunndoagsklaad entmotte,  
aa unsern Opa es uff Zack,  
helt aus em Schronk soin Hochzettsfrack,  
browiert'en oa in aller Hast:  
"Friejer hot der moal gebaßt!"



Aa de Monfred kann mer schwitze seije,  
e Sauna die es nix degeije,  
Soal uffstelle, Fäßer rolle,  
sogar de Monfred schafft do wie en Dolle,  
korz vor de Kerb, des werd immer so gemoacht,  
do wern zwaa zentnerschwere Sei geschloacht,  
die gibt's donn, uff de Kerb stets frisch,  
aus Deitsche Loande uff de Disch,  
aa unser Hertha, ei wie famos,  
die legt im Affezahn donn los,  
do flije im Soal jo glei die Brocke,  
ehr Leit do bleibt kein Auge trocke!

Un aa die Kerweborsch, wie soll's oanerst soi,  
die hänge uff Kerb sich schwer enoi,  
es werd gesoffe, gesunge un gekleistert,  
die letzte Hürde wern gemeistert,  
die Roll' es ferdisch, de Spruch geschrewe,  
aa fern Kerwegag wurd woas getrewe,  
un Freidoags owwends, do werds famos,  
do leije mer donn rischtisch los,  
do ziehe mer 'haus un soin gonz froh,  
woann's haaßt: **"DIE WORFELLER KERB ES DO!!"**



Beim Monfred es als de Deiwel los,  
kumme die Omis mit Kloa und Groß -  
In de Kisch do soin se all om schwitze,  
de Monfred uff de Press' duht sitze,  
unne es donn alles om rotiern,  
Schnitzel backe un paniern,  
Biercher zappe, Gläser spüle,  
in de Kass mit Dollars wühle,  
ob un zu do fällt moal ebbes runner,  
ehr Leit des es jo aa koa Wunner.

Drunner un Driwwer gings do iwverall,  
die Karin stöhnt: "Die honn veelleicht en Knall!!".  
Do es'es werklich schnell bassiert,  
daß mer do de Kopp verliert!  
Statt's Schnitzel, wie soll's onnerst soi,  
bringt die Karin donn en Grindkopp noi,

# Kerweborsch vom Hessische Hof, Worfelle

Kerwespruch 1991

Seite 2

der Ami fregt: "Wot is donn sätt?!"  
die Karin greischt: "E dood Kät!"  
De Ami rufft: "Sätt fress ei net",  
"Donn los bleiwe, ju ahr e zu fett!  
Du kimmst do her un blääkst wie doll,  
vun Dir honn ich die Noas jetzt voll!"

Noch so em werklich harte Streit,  
sehnt mer sich noch Gemütlichkeit,  
drum schlappt se in die Kisch enoi,  
setzt Kaffeewasser uff, wie foi,  
un als es Wasser im Kroppe hippt,  
die Karin aus de Laatsche kippt.  
"Fix un ferdisch bin ich heit,  
des glaabt'er kaum ehr liewe Leit!"  
Es Wasser war haaf, die Weck warn frisch,  
die stellt se erstmol uff de Disch.  
Kaffeebriehe hat'se unnerdesse,  
in de Kisch doch glatt vergesse,  
sie stertz'te zurick on ehr Regal,  
denn fiel se schwer die große Wahl,  
en korze Griff in die Dos' enoi,  
schwupp hot'se Müsli in ehm Filter droi,  
es Wasser kocht, die Briehe die brodelt,  
die Karin gonz vergnüglich jodelt,  
doch wie'se ausschenkt, ei was en Scheiß,  
do war der Kaffee blüteweiß,  
die Katrin denkt: "Wos es donn los?"  
"Des es jo Hawwerflockesoß!"  
Ja Karin, do kann mer nur noch soache,  
mer sollt soi Hern stets bei sich troache,  
daß oam sowoas net bassiert,  
wos hier so kurz glossiert,  
drum singe mer weil's heit nix kost,  
**"JA WENN DAS SO IST, DANN PROST!"**



Letztjohr, korz noch de Kerb,  
mer Worfeller warn do noch ziemlich merb,  
do gabs, horcht zu ehr liewe Leit,  
zwische em Bauer un em Fahrradfahrer Streit.  
Do fuhr en Bauer mi'm Schlepper un em Wenner,  
vorbei on so'em daabe Bräuschter Penner,  
uff dem Feldweg do war fer zwaa zu wenisch Platz,  
do macht der Bräuschter bees de Watz,  
"Uff dem Weg do host Du nix zu suuche!"  
so hert mer den Fahrradfahrer fluuche,  
de Schlepper hält, es steijt Oaner ab,  
"Wos willst donn du, du loamaschisch Kapp?  
Iwwerleg doch erst, wos du duhst soache,  
soll ich moi Maschine uffem Buckel troache?"  
segd do der Bauer gonz gelasse,  
der doll Hund, der konnt's gar net fasse  
uff oamol schlägt der voller Wut,  
dem Londwert mette uff die Schnut.  
Dem Bauer brummt net nur vor Zorn,  
gonz fürchterlich de Knorn,  
die Schubload klemmt, die Lipp' die blut',  
den Axel packt e riesisch Wut --



## Kerweborsch vom Hessische Hof, Worfelle

Kerwespruch 1991

Seite 3

Wer en kennt, der waas Bescheid,  
er es koa Kind vun Traurischkeit,  
mit Roockus steit'er ins Führerhaus,  
un hält sich dort soi Messer raus,  
der Bräuschter der hat do schunn die Hose voll,  
wie de Axel uff'en sterzt wie doll,  
doch hot er'n net, wie Ehr vermutet,  
den Dolle verletzt, so daß er blutet! --  
Noo, der Radler es fast verboche,  
wie'em de Axel do soi Road verstoche!

Un donn, jetzt kimmt's noch rischtisch dick,  
fährt de Axel mit soim Schlepper noch zurick,  
legt en Gong oi, des macht Spaß,  
läßt die Kupplung kumme un gibt Gas,  
guckt zum Fahrroadfahrer niwwer,  
un fährt mi'm Bulldog iwwers Fahrroad driwwer.

Des Fahrroad des kennt'er eich jo denke,  
konnt net me fahrn, un aa net lenke,  
oam Road do war alles om klemme,  
hechstens fern Sperrmüll do konnt mer's noch nemme.  
Die Reife warn platt, es Schutzblech verboochte,  
de Lenker war krumm, de Roahme verzooche,  
die Lomp war kaputt, de Sattel geplatzt,  
mit oanere Worte: "Es Road war verwatzt!"  
Do hot der Dolle sich net meh gemuckt,  
hot nur gonz err, uff die Trümmer geguckt,  
un de Axel indes voller Brass,  
gibt uffem Schlepper rischtisch Gas,  
dreht sich noch um, denkt: "Los mer moi Ruh,  
wie de jetzt in die Brauscht', kimmst des seij mol zu!"  
Liewer Axel, der Oisatz, der war gelunge,  
drum kriegst Du jetzt aa Oan' gesunge,  
fer die Aktion, do singe mer un soin froh:  
**"JA MER SAN MI'M RADEL DO!"**

Vun dem Gebabbel, ehr kennt mers glaawe,  
fängt moi Kääl immer oa zu staawe,  
drum muß ich jetz, ehr kennt's eich denke,  
moin Hals mol schnell mit Woi ausschwenke,  
so duh ich jetz moim Mundschenk winke,  
"Geh her, mer wolle schnell Oan' trinke!"

Noach em gewunnene Fußballspeel,  
feiert mer gern un meistens veel,  
die saufe Bier un mache Krach,  
die leere Käste stehn bis unners Dach,  
es werd gefeiert un gelacht,  
do werd so schnell net schlapp gemacht.  
Noach fuffzeh Bier, des muß donn soi,  
haacht mer sich noch Korze noi,  
de Kopp duht weh, die Fieß die stinke,  
vun weidem schunn die Engel winke,  
es schlägt glei zwölf, mer konn kaum steh,  
so longsom duht mer hoamwärts geh'.  
De gonze Owend hot mer soi Kääl geelt,  
uffem Hoamweg werd erumkrakeelt,  
korz vorm Kiosk, hot's Oan donn veresse,  
do ess er uff die Fratz geschmesse!



# Kerweworsch vum Hessische Hof, Worfelle


Kerwespruch 1991

Seite 4

Ehr liewe Leit bei so'em Krach,  
do werd sogar en Daabe wach,  
die gonz Gelaatstroß stand senkrecht in de Bette,  
gauzt der Besoffene mit dem Hund do um die Wette,  
ehr Leit des war velleicht e Bild,  
der arme Köter der wurd rischtisch wild,  
de Hund der war vor Zorn schunn schwer om Kotze,  
un de Rainer der wollt dem Kläffer on de Krotze!  
Dem Besitzer qinq jo schwer die Muffe,  
net daß die zwee sich do glei knuffe,  
drum hot er glei die Bolizei bestellt,  
die hann den Zores ruckzuck obgestellt.  
Den Dolle hann die sich geschnappt,  
un soin donn mit em Hoam gedappt.

Die Bolizei war fort, de Rainer war om wetze,  
er wollt mi'm Hund noch e Wörtche schwätze,  
er fand die Unterhaltung rischtisch toll,  
doch der Hund, der hat die Schnauze voll.  
Der wollt vun Konversation nix wisse,  
un hätt om liebste zugebisse,  
doch soi Herrsche des war schneller,  
hält de Flobbert aus em Keller,  
un um den Zerkus obzustellen,  
duht er glei die Bolizei bestelle.

Die Boliziste warn aa schnell vor Ort,  
der Rainer indes mi'm Hund noch knorrt,  
der Hund läßt sich awwer net meh stehn,  
der denkt: "Du Depp hob mich mol gern!"  
De Hoffi der war schee in Fahrt gekumme,  
die Bolizei die hot'en do groad mitgenumme.  
Awwer desmohl, kimmt'er fer alle Fälle,  
noach Gere in die Gummizelle,  
damit der arme Hund,  
endlich rischtisch schloafe kunnt.  
Seitdem, des es so klar wie dunkel Soß',  
hot der Hund e Fußballer-Physchos!  
Immer wonn die Fußballer duhn speele,  
duht den Hund, de Moache quäle,  
soi Herrsche, des muß vum Doktor aus so soi,  
reibt'en donn mit Beruhigungsbalsoam oi,  
damit de Hoffi, wie äwe groad verzehlt,  
im Suff den Hund net noch zu Tode quält.  
Un dem Reiner singe mer gonz flau,  
es Lied vun "HEUTE BLAU UND MORGEN BLAU..."



Moi Zung die schlägt schunn longsom Kapriole,  
ich glaab die muß sich erst emol erhole,  
des geht oam Beste, des wißt'er all,  
mit Kerwewoi vum 'Klinke Kall'.  
Drum schnapp ich schnell moin Halwe Woi,  
un trink en Schluck, wie es des foi!!

# Kerweborsch vum Hessische Hof, Worfelle

Kerwespruch 1991

Seite 5

Korz noach Kerb, im letzte Johr,  
jetzt horcht zu un spitzt es Ohr,  
do wollt sich de Pudding, ei wos en schlaue,  
in soine Scheier e Partyräumche baue,  
doch in dem Raum, des macht fer ihn koan Sinn,  
do warn vun frijer noch zwaa Ausgäng drin!  
Er hot sich korzerhend entschlosse,  
oa Deer werd mit Hohlblock zugeschlosse!


Somsdoags moijends korz noach Oacht,  
macht de Peter schunn e riesisch Joacht,  
er es om schette un om mische,  
duht ob un zu e Bierche zische,  
der arm Kerl war beinoh zu bedauern,  
war in soim Räumsche kräftisch schunn om mauern.  
Es klappt gonz gut, er macht im Nu',  
fast die Deer mit Hohlblock zu.  
Doch korz vor Schluß do merkt der Dolle,  
"Ich muß im Hof noch Stoascher holle!",  
er sterzt enaus, hot sich die Stoa geschnappt,  
indes die oanzisch Deer ins Schloß oischnappt!

De Peter denkt: "Ich werr verrickt,  
die Deer es zu un de Schlissel stickt!  
Wie kumm ich jetz, des kann doch wohl net soi,  
wirrer in moim Partyraum enoi?"  
Koa Deer geht uff, koa Fenster do  
ehr Leit do stand'er dabbisch do!

Die Antwort war, ei wos en Schreck,  
die frisch Mauer muß wirrer weg!!

Em Pudding hot es Herz geblut,  
reißt ob die Mauer voller Wut,  
fünf Stunn Awweit, gonz umsunst,  
korz vorm Aabee in die Hos' gebrunst!!  
Un die Moral vun der Geschicht,  
honn mer fern Peter hier gedicht:  
"Host du de Schlissel in de Hose,  
kriegst beim Mauern Du koa Blösel!"

Un mer Kerweborsch mer wisse jo wie's ist,  
un singe: **"UN ALSEMOAL GESOFFE UN ALSEMOAL GEPISST...!"**



Ehr Leit des war's, des war de Spruch,  
ehr hobt von moim Gebbabel jetzt genuch,  
drum du ich mich jetzt spute,  
es dauert nur noch zehn Minute,  
denn eh daß ich uffher mit moim Geschwätz,  
soach ich zu de Oangler e paar Sätz!  
Uff em Oanglerfest, des wißt er all,  
do warn a die Kerweborsch vum Klinke Kall,  
mit fuffzeh Monn hann mer uns getroffe,  
mer honn dort 'gesse un aa gesoffe,  
es wurd geschwätzt un a gesunge,  
so moancher hot mit Würgreiz sich gerunge,  
awwer, un des soach ich hier, do kennt'er mich vereiße,  
mer dunn koa Gläser mit Absicht uff de Borrem schmeiße!  
Des nämlich, so uhgerecht es halt die Welt,  
wurd uns oam nächste Doach glei unnerstellt,  
23 Gläser die honn gefehlt,  
so werd's im Ort glei rumerzählt,

# Kerweborsch vom Hessische Hof, Worfelle

Kerwespruch 1991

Seite 6

die Kerweborsch honn die all zerdeppert,  
es doch klar, die warn jo all schunn vollgeleppert.  
Un jetzt soll uns doch moal Oaner soache,  
wer hot die 23 Gläser kaputtgeschloache !?  
Wer vun uns, hot mit soim volle Knorn,  
e Gloas uffs Plaster gedunnert, voller Zorn !!  
Es sollt mich wunnern, wenn des gelingt,  
ehr liewe Leit, wie uns sowoas stinkt! --  
Drum mache nächstjohr mer aus Protest,  
veelleicht net meh uff es Oanglerfest,  
denn kann aa Koaner soache,  
mer hä'n 23 Gläser kaputtgeschloache!

Jetzt soin ich ferdisch mit moim Spruch,  
fer desjohr war's wirrer mol genuch,  
ich troll mich jetz un zieh weiter,  
seid immer froh un aa recht heiter,  
de Kerwewatz hot soi Aache schunn verdreht,  
weil'er schunn zwaa Minute uff'em trocken steht,  
drum hipp ich glei mi'm große Satz,  
uff die Kutsch un stell mich on moin Platz.  
Dodevor do ruf ich Eich noch zu,  
aa heit Owend gewwe mer koa Ruh,  
beim Monfred ziehe mer, ei wie foi,  
nochher in de Soal enoi,  
mer mache Stimmung, Joacht un Zores,  
so wie des jedes Johr es,  
ich load Eich oi kummt alle mit,  
denn die Kerweborsch die soin noch fit,  
feiert mit un vergesst die Soije,  
de Friehschoppe es wie immer moije,  
spuckt eierm Chef mol kräftisch in die Suppe,  
denn heit donze bei uns die Puppe!

Ich mach mich fort, moin Hals der kratzt,  
un aa moi Schnut es gonz verwatzt,  
bedonke Du ich mich noch bei alle,  
dene unsern Kerwespruch gefalle,  
un nadierlich Lob ich alle die,  
die uns unnerstützt honn wie noch nie,  
un ermahne du ich aa den Dolle,  
der die Bolizei wollt holle,  
weil die Kerweborsch beim schloafe ihn gestehrt,  
so hot er bei de Gemoinde sich beschwert,  
die Kerweborsch sollte, mer konns kaum fasse,  
gefällischst es Singe unnerlasse,  
do freg ich mich; "Wos e geschnuffel?  
Des es en rischtsche Kerwemuffel!!"  
drum denk droh, wie's war for zwanzisch Johr,  
koan Kerweborschgesang kam domols dir zu Ohr,  
wonn Dir des gefalle hot, ich soachs vor alle Leit,  
do duhst Du uns gonz herzlich Leid,  
fraa dich liewer, daß mer Kerweborsch soin do,  
woann's haaßt: "DIE WORFELLER KERB ES DO!"

